

嘉禾志卷第一

沿革

嘉興路九域志曰上秀州古揚州之境也周時爲吳國釋名曰吳虞也卽太伯避季歷之地吳伐越越子禦之檇李檇李卽今嘉興也舊有檇李城魯定公十四年春秋書越敗吳於檇李至哀公元年吳王夫差敗越於夫椒報檇李也按此則知檇李者吳越之戰地也周顯王四十六年楚威王伐越破之盡取其地至於浙江之北故此地亦名曰楚杜佑通典云吳滅屬越越滅屬楚是也又吳錄地里曰吳王時此地本

禾志一

名長水故嘉興亦名長水秦始皇東巡望氣者云五百年後江東有天子氣始皇至今囚徒十萬人掘汙其地表以惡名改之曰由拳又按寰宇記云始皇東遊至長水聞土人謠曰水市出天子從此過則人乘舟交易應其謠遂改由拳縣又曰故由拳縣在今縣南五里始皇見其山上有王氣使諸囚鑿此山囚倦並走因號爲囚倦山置囚倦縣後人訛爲由拳水經云秦始皇改爲囚卷亦曰由卷西漢屬會稽東漢屬吳郡吳黃龍三年由拳野稻自生改爲禾興志瑞也赤烏五年因立太子和改爲嘉興晉宋齊梁因之隋

平陳陳置蘇州廢嘉興入杭州唐武德七年復置屬蘇州八年廢入吳貞觀八年復置屬蘇州晉天福四年錢元瓘病支郡多闕而右藩疆大始更邑爲州遂奏以嘉興爲秀州絕其華亭海鹽二地同附於州乃以境西義和聚爲崇德宋政和七年八月二十二日改秀州爲嘉禾郡甯宗慶元元年以是郡爲孝宗毓聖之地陞嘉興府嘉定元年十一月因守臣趙希道奏請賜嘉興軍額聖朝至元十三年正月改爲嘉興府安撫司至元十四年三月改爲嘉興路總管府領府一縣三司一錄事司城以內隸焉宋置南北西三

廂聖朝至元十三年廢遂置兵馬司至元十四年改爲錄事司  
松江府舊華亭縣也唐天寶十年置華亭縣屬蘇州治按新史寰宇記以爲本嘉興縣地輿地廣志以爲本崑山縣地元和郡國圖志云吳郡太守趙居貞奏割崑山嘉興海鹽三縣爲之今四境與三縣接郡國圖志爲不誣矣唐僖宗入蜀時羣盜盤結王騰據華亭其後吳越王錢鏐遣顧全武拔之自此地入吳越按通鑑乾甯四年錢鏐遣顧全武取蘇州乙未拔松江戊戌拔無錫辛丑拔常熟華亭是也晉天福五年

以嘉興縣爲秀州而割華亭隸焉通典寰宇記云地有華亭谷因以爲名輿地志云吳大帝以漢建安中封陸遜爲華亭侯卽以其所居爲封谷出佳魚蓴菜又多白鶴清唳故陸機歎曰千里蓴羹未下鹽豉及臨刑歎曰華亭鶴唳不可復聞又按陸遜傳云遜初封華亭侯進婁侯次江陸侯漢法十里一亭十亭一鄉萬戶以上或不滿萬戶爲縣凡封侯視功大小初亭侯次鄉縣郡侯以遜所封次第攷之則華亭漢故亭留宿會之所也昔縣有華亭鎮印或者遂謂自鎮爲縣不知所謂鎮者唐因隋制置鎮將副以掌捍防

守禦之事縣之冗職耳祥符圖經載鎮在西南二百步而元豐九域志則廢矣如自鎮而爲縣則新史輿地志諸書不應略而不言也若夫雲間之名則自陸士龍對張茂先所謂雲間陸士龍一語得之也華亭民物稍蕃庶聖朝至元十四年陞爲華亭府至元十五年改爲松江府領縣一

華亭

嘉興縣唐史九域志云望嘉興縣輿地廣記敘秀州以爲春秋時吳越分境於此杜預曰嘉興縣南有樵李城今之嘉興縣境吳之南境也秦爲由拳縣西漢地理志注云柴辟又云就李水經云辟塞皆舊名也

漢以後中間沿革詳見本路所載矣晉天福五年陞嘉興爲秀州寰宇記云嘉興監者今秀州嘉興縣煎鹽之所宋陞爲監後併爲縣而隸秀州焉其先三十二鄉熙甯中析五鄉隸崇德止二十七鄉今仍舊海鹽縣輿地志云上海鹽縣唐地理志曰蘇州海鹽緊九域志曰望海鹽秦郡縣天下粵二十年甲戌置縣屬會稽郡漢因之地理志云武原有鹽官寰宇記云廣斥鹽田相望卽海鹽鹽官之地吳王濞置司鹽校尉居馬皞城故水經云吳王煮海爲鹽於此縣也王莽時改爲展武後陷爲湖是爲柘湖湖中有山生

柘樹因名焉今在松江府南七十里金山北移治武原鄉爲武原縣後漢復爲海鹽順帝時又陷爲湖是爲當湖遂移治故邑山爲故邑縣晉成帝咸康七年復爲海鹽縣又移處故馬皞城至陳武帝割屬鹽官唐高祖武德七年復屬蘇州太宗貞觀元年省入嘉興睿宗景雲二年復置先天元年廢二年百姓以應奉塗遠艱於往來又請置明皇開元五年蘇州刺史前黃門侍郎張廷珪奏是年五月敕置郡於舊海鹽縣吳禦越城西北立定集而置縣今縣治也昭宗大順中割歸杭州晉天福五年置秀州縣隸焉宋因之

今仍舊

崇德縣九域志云崇德縣古越地也輿地廣記敘崇

德云有語兒水亦曰禦兒越之北境也魯定公十四

年吳伐越越子句踐禦之陳于檣李杜預曰吳郡嘉

城今禦吳越春秋云句踐五年入臣於吳羣臣祖道

至淞江上是淞江之西皆入吳境句踐七年既釋囚

反國厚獻吳王夫差夫差悅之賜書增封於是禦兒

復為越之北境國語曰句踐之地西至句無北至禦

兒韋昭注今嘉興句踐之報吳也徒舍至於禦兒大

夫種曰吾以禦兒臨之韋昭注禦兒越北鄙言吳邊

志一

五

魏明帝時王景淵諫營宮室亦曰句踐欲廣其禦兒

之疆馘夫差於姑蘇釋之者謂禦兒吳界邊戍地名

斯可驗矣太平寰宇記敘杭州云越國之西境西北

也句踐滅吳傳六世為楚威王所併地屬楚秦郡縣

天下總吳越舊地置會稽郡禦兒為由拳縣之西鄙

介於錢唐烏程之間漢武帝時伐東粵東粵使徇北

將軍守武林樓船軍卒錢唐轅終古斬之元封元年

閏四月封語兒侯孟康曰越中地也今吳南亭是攷

之唐乾符中所立崇福寺二石經幢一云嘉興縣語

兒鄉一云語兒市然則語在唐其名如故黃巢之亂

豪傑起義兵保護鄉井遂陞爲義和鎮餘杭吳公約  
隨董昌禦巢於西鄙奏置都額於硤石兼授義和鎮

遏使後其子重裕襲拜西佳鎮遏使兼義和鎮事

見羅

隱撰吳公約碑

吳越有國廢鎮止稱義和市塘左則語兒市

三朝國史云有語兒亭故地名語兒按水經載萬善  
厯曰吳黃武六年正月獲彭綺是歲由拳西鄉有產  
兒便能語云天方明河欲清鼎腳折金乃生因詔爲  
語兒鄉非也又嘉禾百詠載舊傳西施產兒於此至  
能語方去尤可笑也蓋語兒當爲禦兒晉天福閒始  
析崇德七鄉置縣於義和市因鄉以名縣五年春三  
月敕嘉興縣爲秀州以崇德縣隸焉宋因之熙甯十  
年又割嘉興縣梧桐永新清風保甯千金五鄉以益  
之總十二鄉今仍舊

### 星野

周官保章氏以星土辨九州之地所封封域皆有分  
星以觀妖祥故志郡邑者必攷焉西漢地理志曰吳  
地斗分野也又曰粵地牽牛婺女之分野也晉天文  
志曰自南斗十二度至須女七度爲星紀於辰爲丑  
吳越之分野屬揚州費直起斗十度蔡邕起斗六度  
又列州郡躔次云丹陽入斗十六度會稽入斗一度

由此觀之嘉興乃斗之分野而崇德處吳越之間則獨在斗牛躔度之交按五代史載豫章人有善術者是秋占者望斗牛閒有紫氣旣而移蹕維揚謂其已驗暨冬十月戊寅孝宗虹渚之祥實在嘉興非明驗歟故備載之以俟知星者

道里

嘉興路

東西三百一十八里

南北九十一里

志一

七

至上都

陸路四千三百八十四里

水路四千一百里自大都登陸路至上都四

千九百里

至大都

陸路三千五百八十四里

水路四千一百里

四至

東至大海二百一十里

舊經云一百九十七里

西至杭州路二百一十九里

南至杭州路硤石鎮界六十里

北至平江路吳江縣界三十里

八到

東南到海九十二里

舊經云東南到海鹽九十里

西南到杭州路鹽官縣界一百里

東北到平江路吳江縣界六十里

西北到平江路吳江縣界四十二里

陸路

東至松江府一百二十里

西至崇德縣九十五里五十步

悉一

八

東南至海鹽縣九十里

舊經云八十里一百步

西北至平江路吳江縣一百一十二里一十步

水路

東至青龍鎮一百九十五里

西至湖州烏程縣界七十里

南至海鹽縣九十里

舊經云八十里一百步

東北至平江路吳江縣一百一十二里一十

步

松江府

東西一百六十里

南北一百七十三里

四至

東至海八十里

西至平江路長洲縣八十里

南至海九十里

北至平江路崑山縣界八十里

八到

東南到明州界九十里在海中

西南到海鹽縣界六十里兩縣相去一百二十里

東北到平江路崑山縣界一百二十里兩縣相去

志一

九

一百三十二里

西北到平江路崑山縣界一百五十里兩縣相去

二百里

陸路

西南至嘉興縣界六十里

東北至青龍鎮五十四里

水路

東北至青龍鎮入吳江五十四里

西南至嘉興縣界六十里

西北至吳江六十里

嘉興縣

東西七十里

南北八十里

四至

東至松江府華亭縣風涇界六十里

西至崇德縣官窰鋪五十里

南至海鹽縣莫涇鋪四十五里

北至平江路吳江縣界二十里

八到

東南到海鹽縣界四十五里

志一

十

西南到崇德縣界官窰鋪五十里

東北到平江路吳江縣界七十里

西北到崇德縣烏青鎮五十四里

陸路

東南至海鹽縣界莫涇鋪四十五里

西南至崇德縣界官窰鋪四十五里

舊志云至崇德

縣九里

東北至松江府華亭縣界風涇鋪六十里

舊志

云至華亭縣一百二十里

北至平江路吳江縣界遞鋪三十里

水路

與陸路同

海鹽縣

東西一百五十九里

舊志云一百九里

南北一百三十三里

舊志云一百三十二里

四至

東至海五里

舊志云三里

西至杭州路鹽官縣六十三里

南至杭州路鹽官縣界四十八里

兩縣相去九十五里

北至嘉興縣界七十三里

志一

士

八到

東南到海二里

西南到杭州路鹽官縣界五十里

東北到華亭縣八十九里

西北到嘉興縣界松楊涇四十五里

舊志云八十里

陸路

西南至澉浦三十六里

西北至嘉興縣界四十五里

水路

東北至當湖五十五里又北行至華亭縣九

十里

西南至澉浦鎮三十六里

西至杭州路鹽官縣六十三里

西北至嘉興縣界四十五里

崇德縣

東西五十四里

南北三十五里

四至

東至嘉興縣靈宿鄉界六十里

西至湖州路德清縣金鵝鄉界十五里

悉一

三

南至杭州路鹽官縣昌亭鄉界五里

北至湖州烏程縣移風鄉界三十里

八到

東南到杭州路鹽官縣元吉鄉界一十里

西南到湖州路德清縣金鵝鄉界二十里

東北到嘉興縣靈宿鄉界六十里

西北到湖州路歸安縣太原鄉界三十里

陸路

南至杭州路鹽官縣界五里

東北至嘉興縣界五十里

舊志云六十里

水路

東北至嘉興縣界南谷湖五十里

西自縣西長營涇至德清縣界苕里涇一十五里

南至杭州路鹽官縣界五里

北自縣北長營涇至湖州烏程縣界三十里

風俗

舊經云罕習軍旅尤慕文學不憂凍餒頗勤農務題名記云惟秀介二大府旁接三江擅湖海漁鹽之利號澤國杭稻之鄉土膏沃饒風俗淳秀文賢人物之

志一

三

盛前後相望百二眾技與蘇杭等

方輿勝覽

前漢地理志云江南地廣或火耕水耨民食魚稻以漁獵山伐為業果蓏蠃蛤食物常足故喾窳偷生而

亡積聚喾短也窳弱也言短力弱材不能勤作故飲

食還給不憂凍餒亦亡千金之家信巫鬼重淫祀又

曰吳東有海鹽章山之銅三江五湖之利江東一都會也海外鯤人歲時來見

敘吳郡志者曰有太伯辭遜之遺風

志會稽郡者曰有夏禹勤儉之餘習

嘉禾志卷第一

嘉禾志卷第二

城社

嘉興路

路城按舊經云羅城周迴一十二里高一丈二尺厚一丈五尺子城周迴二里十步高一丈二尺厚一丈二尺宋宣和年間知州宋昭年嘗更築德祐元年守臣余安裕重修諮議劉漢傑董其役且增築堡障聖朝至元十三年羅城平子城見存羅城元有四門東門舊曰青龍後改春波西門舊曰永安後改通越南門舊曰廣濟後改澄

雋三

一

海北門舊曰望京後改望雲續改望吳而門又分爲水旱門門各有樓惟澄海水門樓因徐珉作亂遂廢聖朝至元十三年後門樓亦閒廢路社壇舊經云子城西北一里八十步今在澄海門內西北一百步

松江府

府城舊爲縣城周迴一百六十丈高一丈二尺厚九尺五寸後無之宋紹興乙亥歲酒務鑿土得唐燕胄妻朱氏墓碑以咸通八年窆於華亭縣城西一里鄉名修竹是唐之置縣固有城矣廢興

之由莫得而詳焉縣境內西南稱南城亦不可  
曉

古城在華亭縣西六十里按祥符圖經所載也今未  
詳所在

府社壇舊爲縣社在華亭縣西北二里

嘉興縣

縣城按舊經云周迴二百二十五步宋淳熙閒僅餘  
一百步今皆無之矣

檇李城在縣南四十五里高二丈厚一丈五尺後廢  
按舊經故戰場在縣南四十五里夾谷中卽秦

長水縣古檇李城也史記載吳王傷指卒於此  
吳記曰谷中有城故由拳縣治也卽吳之柴辟  
亭神異傳曰由拳縣秦長水縣也始皇時縣有  
童謠曰城門當有血城陷沒爲湖有老嫗聞之  
憂懼且往窺城門門侍欲縛之嫗言其故嫗去  
後門侍殺犬以血塗門嫗又往見血走去不敢  
顧忽有大水漲欲沒縣主簿令吏入白令令見  
吏曰何忽作魚吏又曰明府亦作魚遂乃淪陷  
爲谷矣因曰長水城水曰谷水也  
射襄城在縣東北三十里後廢

何城去縣一百里吳王所築後廢

東顧西新南于北至四城嘉禾百詠注云吳越戰爭時所築後廢

縣社壇舊在縣西南一里一百三十步後移在精嚴寺前壇宇廢圯宋宰李時習修之有舊碑沒於簪井中今止存敗屋爲鋪軍所據

海鹽縣

縣城周迴一百七十步高一丈二尺五寸厚一丈後廢

古城在縣東南五十步

志二

三

歟城在縣西北一十八里周迴一里今止有歟城橋城不存

故邑城在縣東北三十六里周迴半里

縣社壇在縣西南半里

崇德縣

縣四城在邑境者三

營城屬鹽官

傳皆吳王所築遺址尙

存何城在縣西二里晏城在縣東北二十里萱城在縣東三十里張堯同賦何城日報越心何壯貪齊意已輕忠言殊不聽何用築斯城

縣社壇在縣西二百步入門而南有齋廳三楹廳之

南五壇壇各有三級

風伯雷  
雨師

繚之以牆廳值災

政和閒重修社壇碑記磨滅幾不可讀大率全備敕牒之語敕牒則盡述江東提舉沈延嗣奏請之辭當時按式圖鏤版行下故式圖刻在碑首歷年雖久壇制如式

### 坊巷

### 錄事司

迎年坊在春波門內

名義舊名春波後改是名蓋取迎青帝於郊祈福豐年之義

志二

四

正興坊在朱巷

名義舊名永興後改是名蓋取經正則庶民興之義

登春坊在春波門內

名義通春波門故取熙熙然如登春臺之義

宜民坊在嘉興縣前

名義通嘉興縣故取豈弟君子宜民宜人之義

流虹坊在興聖寺西

名義巷有興聖禪院乃宋孝宗毓聖之地故取華渚流虹女節感而生少昊之義